



萬曆杭州府志卷之六十二

名宦二

國朝會
治職官

國朝

浙江撫視大臣

夏原吉字維喆湖廣湘陰縣人洪武二十三年鄉貢

士歷官戶部尚書永樂初浙西大水奉

命來治至則相度地勢具以浚洩便宜請

上從之原吉布衣徒步躬督畚鍤日夜經畫不息盛

暑揮蓋去曰衆赤體暴日中吾何忍歲饑發廩三

十餘萬石賑民二年還朝復出治水水洩農田大



利時有奏以水退淤肥宜召民佃耕以益國用者原吉嘆曰民疲極矣救死不暇可重役乎即馳奏寢少師姚廣孝還自浙

上首詢原吉之政廣孝對曰原吉溫而不弛威而不猛古之遺愛也原吉與蹇義齊名褻然為社稷臣而治水之勞則尤著效東南百世永賴云

胡槩字元節江西豐城縣人本姓熊以從母適胡氏因從胡姓永樂九年進士官德初以大理卿奉

命巡視兩浙諸郡以瘼海鹽民史慶真招聚無賴恣行剽掠聞槩至舉家遁匿槩密捕得之抵死於是

奸宄屏迹海寧諸衛所各言軍餉不足槩令嘉興等府以所收贓罰米支給又奏兩浙累歲逋稅輸納艱難

詔許以絲絹等物代輸一時便之所至於困窮興學校風猷振厲奸民不便其所為權貴挾私怨者又多造飛語衆口交謗

上倚信槩不為動也後晉官都察院右都御史復本姓卒

周忱字恂如江西吉水縣人永樂二年進士官德五年以東南財賦煩敝廷薦陞工部侍郎巡撫江南

兼轄浙西三郡後晉尚書仍巡撫在任二十二年
經畫田里處置貢賦纖悉必當先是胡槩爲巡撫
用法嚴峻忱濟以寬簡凡告訐輒不省或面詰公
不及胡卿使我情不得上達忱笑應曰卿
勅有祛除民害語我

勅但曰撫安軍民

朝廷任使自異耳其實大有容如此正統六年至海
鹽築扞海塘海患遂息七年因通判易輓之請脩
築杭下塘隄岸兵行者得免風濤之虞語詳事紀
中江南之人愛戴如父母至今老幼皆稱周尚書

云

善曰胡周二公相繼撫視東南咸著聲蹟而寬嚴
不同擬之馭軍胡如臨淮周如汾陽咸稱良將而
汾陽其尤勝矣

王翺字九臯直隸鹽山縣人永樂乙未進士以西楊
薦爲御史謹重達大體正統初擢僉都御史鎮江
西尋移節巡視浙江拊善擢奸吏民畏愛官至吏
部尚書卒贈太保謚文恪李南陽謂臯陶言九德
翺有其五彭惠安亦謂古三不惑於翺見之世稱
確論

彭韶字鳳儀福建莆田縣人天順丁丑進士弘治中以刑部侍郎兼僉都御史巡視浙江時千戶陳勇倡亂浙西奉命誓師一鼓殄滅因劾罷不職守臣數人擊貪殘吏以訓在位百司悚息計臣言鹽法沮壞命兼清理釐奸革弊恤竈通商繪煮海貧人晒淋煎負折閱朋償之苦節爲八圖以獻因獲蠲逋負貧竈始蘇流亡益鮮平生溫恭孝友直諒廉明清白一節終始無替貴爲六卿而儀狀歎如寒士至爲國家愛法紀義色昌詞卽貴育不能奪也所著有莆陽文獻志政志名臣錄贊仁終刑部尚書致仕贈太子少保謚惠安

陶琰字廷信山西絳州人成化辛丑進士弘治末爲浙江右布政使有賢聲正德七年江右盜起流劫開化江山常山諸邑三衢騷動朝廷求廉正重臣以靖之乃命琰以右都御史來巡視防要害厲兵戎簡才將時將領有李隆者才勇善謀乃拔自行間任待不次以是臨戰輒克所向無前境內旣平益務爲節儉以撫凋瘵革迎春之社省輿臺之役諸可斥以佐民者爲之不遺餘力當是時上下相戒不得爲浮淫以踰禁防中官有事浙土者

皆憚其方嚴不敢恣橫仕終太子太保南京兵部尚書平生才宏器偉憂國勤民前後在浙中兩著聲績自奉儉薄每飯一蔬徵行蕭然行李三竹笥相隨數十年卒贈少保謚恭介子滋正德甲戌進士爲武選郎中論大禮忤旨謫戍而卒士論惜之

善曰士大夫以武功顯者往往習爲豪侈費民財至不貲此頑鈍亡行介冑之麤者耳安足貴哉陶公詰戎講武平寇立功而益務爲節儉以率民彼所謂善處勝者耶語曰執賊易持氣難位高志下功成不居公之賢於人遠矣

王惇字民應直隸太倉州人嘉靖辛丑進士壬子歲以僉都御史提督軍務巡視浙江尋改巡撫時倭夷犯浙軍府草創惇籌度戰守安輯諸務蚤夜矻矻簡才將俞大猷湯克寬委心任之奏釋在繫都指揮盧鏜尹鳳此數人者皆東南驍將惇能得其死力配以所募括蒼諸勇士俾擊賊于海港之橫嶼時出奇截殺餘黨于諸洋中俘馘甚衆點賊蕭顯逼松江松守告急惇酌卮酒激鏜立功鏜掩擊大破之按江左者以聞朝廷以惇立功境外賜

金幣甚渥甲寅秋晉副都御史移鎮大同已又晉
兵部侍郎總督薊遼軍務被搆死時論惜之隆慶
改元子世貞伏闕上書稱父寃狀有旨復原
官今祀浙名宦惇質直樂易在浙馭軍寬簡然犯
軍律者罰無赦以是不敢橫恣嫗育黎庶視之若
子民有犯節與譁聲徹莫府者悉置不問遣罷編
戶守城之役曰寇未至毋先困民民尤德焉當其
去擁輿泣送者填道語在事紀中嘗籍罪沒田三
百畝于學宮爲贍士資兵官有辱諸生者杖之軍
門其不偏右所統勸學教士如此

胡宗憲字汝貞直隸績溪縣人嘉靖戊戌成進士宣
歲以御史按浙時浙西寇熾甚宗憲行部嘉興計
賊初至時必渴遇酒輒飲乃投藥酒中賊至果恣
飲毒死者甚衆乃督兵勦殺大破之于王江涇又
破之于平望自是用武畧見推超拜僉都御史提
督軍務兼巡撫浙福晉總督時浙地寇患匪一乃
其中狡黠鼓亂則徐海爲最海之下有陳東葉縣
辛五郎皆趨捷善戰爲之羽翼若王直則雖陽見
款順寔發縱首禍者也宗憲乃先遣間計暗海俾
以次縛麻與東孤其黨與辛五郎者方擁衆金塘

勢頗熾說不可下宗憲別遣將盧鏜一鼓擒之事
既定乃與巡撫阮鶚督諸道兵勦海干平湖之沈
家庄海軍孤勢蹙旋就夷滅倭夷所恃者海海旣
死無倡兵者疆事駸寧謐矣又遣辯士說直來降
斬于市諸本末具胡松茅坤田汝成所紀志中居
浙八年捷凡數十上此其著者累進少保兼太子
太保兵部尚書右都御史官一子錦衣千戶壬戌
被逮至京師上念其功宥使歸尋坐羅龍文事
復就係竟死獄中隆慶六年詔復原官賜祭
葬宗憲有膽勇機智善因人器使其行賞畀刻于
金不吝於謀勇可錄者能折節遇之以故將佐策
士皆樂爲驅馳盡力敢任危疑不以文法自困方
用間啗賊時旁睨者爲之惴惴宗憲處之無驚卒
成戡定功浙人誦之

善曰世之病少保者恒曰當其在事士卒驕而帑
歲糜貴勢游客得以關說攫重貲俾斯人力詘于
供輸氣摧于侮抑則或然矣不思方直海倡亂兩
浙繹騷焚掠郊關城門晝閉群民如在鼎釜若今
則安居飽食從容行市里間無枹鼓之警二十餘
年伊誰力也信若所云乃其功不足相衡準邪夫

大臣臨戎制勝自當節愛公慎以居成功而品騭者則毋過爲刻核可也

或問胡新安與龐南海之功孰鉅予謂新安當亂時脫民於鋒鏑南海居理世拯民於水火此兩公者皆廟食百世功也

阮鶚字應薦直隸桐城縣人嘉靖甲辰進士癸丑歲任浙江提學副使時寇始發難鶚所頒教令兼以兵謀迪士行部必校射并演陣法于學宮乙卯春賊掠塘棲鶚王守武林門奮議納郊關并都鄙士女于郭內多所全活語在事紀是歲夏賊屯湖市

縱剽掠乘鉞者惟王城守計鶚憤之命諸生林某率所練兵卒百餘人擊賊于混堂橋壯士湯十八奮矛而前賊衆披靡以兵寡退歸向得如湯者數十輩賊可走矣丙辰晉廣西叅政未行時胡宗憲已轉總督擢鶚僉都御史巡撫浙江 璽書未至鶚聞乍浦圍急卽卷甲趨救之猝遇賊于阜林遂入保桐鄉賊首徐海陳東等急攻城鶚躬冒矢石與知縣金燕分兵堅守散千金募死士縋而擊賊多所殺傷且屢爲書責胡赴援詞意侃侃悲壯賊技殫不能下月餘解去鶚出自圍中卽東渡擊賊

別黨于僊居殲之復馳歸與胡合兵擊海時世
廟遣尚書趙文華出與兩人議撫勦便計胡持猶
豫鶚力主勦遂合軍以火攻覆其巢人避鶚正議
捷聞與胡並受獎諭晉副都御史移撫福建
居一歲所爲浮議所中被逮得釋歸尋復以稽覈
軍實聽勘未白卒後閱得犒兵諸籍于閩院中事
始白入祀名宦祠鶚督學時遇諸生有恩禮惓惓
培植士節其涖軍慕古法綏御將吏躡躡餌糈與
羣下同甘苦設竒用間恒中機宜乃論者猶或指
摘要之其功不可泯云

浙江經畧重臣

湯和字鼎臣直隸鳳陽縣人吳元年以御史大夫帥
師征兩浙時方國珍據台溫慶元和以書諭降之
士民安堵洪武十八年奉命巡行海徼相度地
形改創衛所巡司險要爲防禦計海寧縣城亦其
所增築也迄今談兩浙備倭方畧多推本于湯襄
武云

鄧愈直隸虹縣人自臨濠率衆歸國充管軍總管
有功擢元帥歲戍戍從王師南征太祖取建
德蘭溪諸暨等縣愈取嚴州攻淳安賊帥金子珍

敗走降其卒三千餘人已亥畧浙西臨安大敗張
士誠兵于閑林寨愈爲開國功臣其勛蹟在浙
中者如此

浙江守禦重臣

胡大海字通甫直隸虹縣人生而智力過人甲午歲
謁上爲前鋒累用先登功授右翼統軍元帥宿
衛取徽嚴時橫槊陷陳又攻下蘭溪再陞僉行樞
密院事收諸暨衢處等縣上以婺爲浙東大郡
通甌引越必得重臣控制之乃授大海江南行省
叅政守婺州壬寅苗軍帥蔣英叛而西歸大海遇

害婺人皆哀痛流涕後獲英至京上命刺其血
祭大海贈越國武莊公祭于壺廟

善曰越國嘗有言曰吾不知書吾行兵惟有三事
不殺人不虜婦女不焚廬舍以故所至兵輯民安
論者謂其有祭征虜之風當其時吾浙被患澤多
矣卽其功烈不著于浙右於法固不得遺之大海官列

江南行省不與江浙行省
同例故收入守禦重臣內

耿再成字德甫直隸五河縣人癸巳來歸累功陞元
帥上取金華爲前鋒屯縉雲取處州卽命統勁
兵以鎮其土先是士卒無論大小徵私粟民間號

若糧莫敢誰何再成以白胡叅政盡罷此若糧民德
之壬寅舊降苗帥賀德仁叛再成方與客飲聞變
卽上馬戰卒不滿二十人迎賊大罵被刺罵不絕
聲死追封高陽郡公建廟處州加封泗國公諡武
莊

浙江巡按御史

汪霖字潤夫直隸六安州人景泰甲戌進士天順間
以監察御史按浙時錦衣指揮門達怙寵擅權奸
作威福人有纖介隙卽重法按之舉朝側目屬其
子商於浙鎮守以下咸相禮敬霖獨不爲禮歸諧
於達達怒遣人偵之卒無可罪累官僉都御史
善曰汪之按浙不畏強禦部內咸嚴憚之其部使
者之傑然者與后二十年有暢公亨者其風采畧
與汪同然暢爲權奸所中而汪公獨無可指其守
身抑又嚴矣豈士君子之所遇固有幸不幸哉

李綱字廷張山東長清縣人天順丁丑進士官御史
天順八年按浙峭直不避貴勢公廉有威振舉綱
維百度貞肅 憲廟嗣位首請斥胡僧伎士直聲
震臺中任至右僉都御史督漕兩淮卒平江伯陳
豫惡綱簡伉乘其歿突至官邸檢箚篋惟衣書而

已 上知其清忠特賜祭葬

侶鍾字大器山東鄆城縣人成化丙戌進士授監察御史十三年來按浙搏擊豪強發摘奸宄臺綱振肅威望丕揚吏民畏之若神明所部凜凜仕終戶部尚書在民部多所建白善回 主上意有裨國計甚鉅爲世名卿云

劉魁字士元山東高唐州人成化丙戌進士十九年按浙憲體明肅紀法森嚴按治奸回不撓貴勢竟以直道忤物左遷黃梅丞屢薦不起聲望益著平生純孝公正不欺對妻子與外人未嘗異言

荆茂字庭春湖廣寧遠縣人成化戊戌進士二十二年來按浙先是糧無定額胥里爲奸茂至與郡邑能吏熟議總計所治地里定爲糧則正耗折減一以 國儲爲準圖籍既定吏弊頓祛藩司有僞牒竄名胥吏者茂盡發之至八百餘人桎梏相屬傳聞京師人以爲竒績伸冤擊奸嚴科舉以得士人心傲惕風采燁然

善曰自 憲皇中季至

孝廟初年來按浙者率多名賢如侶公鍾法而正陳公金察而嚴荆公茂精而核然侶陳皆躋大位長

六曹而荆公不得膺仕豈非命耶乃其徵糧之則法施於民澤及後世卽三公萬戶不易也

暢亨字文通山西河津縣人成化戊戌進士弘治元年來按兩浙威行令肅嫉惡如讐貪墨吏望風引去百司震懾彈劾不避權貴時鎮守中官張慶兄敏得寵于上怙勢虐民亨疏其惡遭反噬謫知

黃梅縣卒于官

善曰暢公按浙威聲暴人耳目至今猶凜凜有生氣假令彼折節貴寵卽立致顯膺無難於今亦泯滅無傳焉善仕者顧以彼易此哉

陳金字汝礪湖廣應城縣人成化壬辰進士弘治二年按浙鋤強雉梗力折奸回持法秉公不撓貴勢監臨試事綜理周詳宿弊盡革還京以才望推掌三法司事累官柱國少保都察院左都御史

吳一貫字道夫廣東海陽縣人成化辛丑進士弘治十年按浙精敏強毅敢于有爲吏治民情洞見底裏故刷奸剔蠹無遺酌科差務節省以紓民困仍著爲條式俾垂永久民咸賴之歷大理少卿以剛直忤逆瑾謫嵩明知州瑾誅復江西按察副使進按察使卒

謝綬字朝章山東朝城縣人成化甲辰進士弘治甲子巡按浙江時歲歉中官監督上供織造費鉅萬責限甚嚴民苦之綬上疏力陳民饑不能措辦乞停止竟得寢

張縉字元素四川巴縣人正德戊辰進士已卯按浙性持重不事苛細而綜理詳慎風紀克張江藩逆濠蓄謀不軌預置心腹畢真爲浙鎮守威洩羣屬恩結士卒潛圖策應縉知狀佯示款好乃深慮而密防之練兵儲粟以備不虞六月報聞濠于十四日戕殺撫臣稱兵犯順杭城戒嚴七月十四日晡

刻鎮守傳令三司期來日四鼓下操衆訝之疑其爲變縉定計以是日出表比禮竟則天已大曙謀不得行復與郡守留志淑議先伏兵真府外諸司盡入遂脅真使去諸左右復盡得府中藏甲咸以屬吏真懼不知所爲不踰月江右平後論治逆黨遂按誅真初逆謀始露時人心洶洶賴庶尹同心奸謀遂寢卒奠安兩浙者本縉與藩臬諸人之力也縉後位至副都御史祀名宦

善曰畢真始發謀時欲搖動兩浙非公逆折之城盡甲矣安危之機間不容髮今定計於微逆謀

木州府志 卷之三 名宦 三十一
遽沮杭民亦厚幸哉舊所傳述以其功歸公及考
載記其事乃詳於留守家狀中証以故老之言良
驗予爲之敘次如此云

唐鳳儀字應韶湖廣邵陽縣人正德戊辰進士十五
年來按浙明察有爲嚴擊奸貪以植良善杭俗婚
娶論財女多愆期不歸鳳儀禁止抑勒俗爲一變
奸民投充鎮臣爪牙害民者悉逮捕抵法民皆誦
之

王璜字庭實直隸濬縣人正德辛巳進士嘉靖六年
來按浙嚴威儼恪望之起畏鎮臣奸胥有南張者
大爲民蠹璜首按致其罪市里稱快藩大吏不慎
名檢璜惜其才冀彼倏改厲聲色窘挫之大吏請
悔過乃巳由是上下震懾奸貪吏至望風引去時
永嘉方柄·國家人暴橫璜行部至以法繩之屬
京察竟以嚴苛奪職璜去數十年至今稱名御史
者必曰王公云

善曰予幼時自里閭間望見王公偉儀鐵面目光
炯炯射人私竊計曰此御史有威望必且能伐奸
巳而果然彼於永嘉無畏他何所計哉

李佶字子健四川金堂縣人正德辛巳進士嘉靖十

年以御史按浙端雅明察擊刺無諱藩臬諸大吏恃執政者內援事多不職佶首列其狀坐是忤柄臣意未幾補南康府知府尋以枉道褫秩士論惜之

舒汀字紹安候官縣人嘉靖乙未進士先以御史按直隸之江南四郡鋤擊奸豪風裁赫著癸卯來按兩浙其嚴峻稍減按直隸時而秉法懲惡肅吏庇氓矻矻猶昔懸令各市中凡官吏抑取常例錢并和買者俾民得執以入告然不爲空文時時密事偵探卽民畏勢隱忍汀恒自知之嘗有二郡倅以裡衣敝市彩帛于民汀於其白事畢問曰聞昨市帛有之乎倅皇恐對誠有之特平直貿易非敢有侵細民也汀笑曰良然吾偶問及耳自是羣僚相戒毋多遺隸市物貴勢家習爲橫恣者一時抑首自戢至今稱名御史云

善曰舒公風裁凜然百吏震恐暴勝之之流也當時有訾詆其受屬吏饋遺者用是不大見信于世今聞其身沒家甚貧所受安在也公去浙垂四十年故老猶恒道之謂聞公名可以止兒啼彼所謂烈烈者哉

趙炳然字子晦四川劍州人嘉靖乙未進士以癸丑
歲來按浙正大博篤風裁屹然核吏治糾官邪察
民隱部內不嚴而肅歲壬戌浙撫臺以事逮 詔
獄炳然以兵部侍郎復來撫浙前撫院有攘寇功
用日益奢頗以此失士民心炳然既受代身持節
儉以綏靖民去諸浮濫蠹政者汰冗食定兵制減
額餉立哨道造喇叭唬兵船建羅木營先是浙兵
未練調集客兵以剿賊立功素已驕恣又不立營
舍以安戢之往往寄寓僧寺或散處民間出入無
禁遂去爲奸盜甚則白晝攫金暴橫無已炳然深
知其害乃建營分處各兵禁其出入有犯禁者卽
按誅如律兵乃戢浙人感其德貌像營中祀之炳
然立身居官以誠爲本天下識不識皆知爲正人
端士云仕終兵部尚書

善曰趙公在浙治行惟爲撫院時功德最多以歲
近不中律法不得書故追敘其按浙之歲而併爲
論叙如此

兩浙巡鹽御史

龔謙字廷益高郵州人景泰辛未進士授御史巡鹽
兩浙時中官汪直家人怙勢開中論罷之浙西亭

民饑開運河使食其力發帑金賑濟政聲大起清
軍湖藩卒於官居鄉孝友廉靜成化間崇祀鄉賢
陳宏字不道福建龍溪縣人天順甲申進士成化四
年按浙鹽政憲體明肅聲望赫然適彗見 詔求
直言宏抗疏論商輅當 康定朝不能保護儲位
以安 國本無大臣風節宜罷輅以謝天譴時輅
方柄事衆莫敢犯宏獨指斥之人皆重其敢言

方珪字純潔福建莆田縣人成化己丑進士由翰林
庶吉士授監察御史癸卯來巡兩浙及松常鎮鹽
課時錢學士子鬻販私鹽巡撫都御史檄蘇州府
吾心也有死而已聞者嘆其毅直繫久得釋放歸
田里瑾誅起擢副使致仕

善曰自建治以來巡鹺使者多矣英風義槩耿心
峻節如王公者不亦難哉處滄俗不渝其貞臨患
難不改其志以正自誓無嘖今名公之賢於人遠
矣

王秀字士英山東萊陽縣人正德甲戌進士十六年
以御史巡兩浙鹽政時中貴稽留水程勢要侵牟
民利佔中無紀鬻販者衆商賈不行秀乃預授水
程以便商立水柵於要害以遏私販場竈所在設

巡兵以邏察之嚴糧船夾帶之禁由是豪右屏跡積弊肅清

王朝用字行甫陝西隴西縣人正德辛巳進士嘉靖六年以御史巡鹽兩浙明習憲體敏於見事而性復持重不妄興革成化中以額廣商狹奏折半額解銀輸京逮嘉靖初額狹商廣鹽多私販朝用奏復舊額國課充羨而官運不勞邊儲速濟民商兩便私販自弭事詳碑記

江清軍御史

子輔字翊之江西廬陵縣人自太學生擢監察御

史端謹清約風裁峻整永樂甲午以清戎按浙不厲威嚴風紀丕振鋤強植善所部皆畏懷之憲使周新素嚴重少所許可獨於子輔則亟稱曰賢御史也陞廣東憲使後左遷諒江知府黎利寇郡子輔死之事 聞贈叅政遣官 賜祭復其家

吳訥字敏德直隸常熟縣人由薦舉任監察御史宣德初按浙清戎敬慎嚴肅風裁凜然下車卽採歌謠行舉刺豪強斂手貪吏屏息嘗修岳武穆墓毀學宮秦檜諸聖賢像跋碑皆有關風勸所著有小學解文章辯體行世仕終左副都御史謚文恪

陳玉字德卿山東沂州衛人成化丁未進士弘治十一年清戎兩浙持法秉正不激不撓勾檢逋亡以充尺籍而民不知擾後陞浙江提學副使學政公平品鑒精當累官右都御史掌南院

程材字良用直隸歙縣人弘治己未進士十八年以清戎按浙疾革召屬吏語曰吾爲繡衣使者上之不能勤宣 德意以振綱維次之不能綜校簿書以報 成命卽死且有餘愧慎毋歛賄賻以益吾過時有族叔在浙西求一訣材曰爲謝吾叔察院豈私見所耶叔大哭而去

善曰清戎御史之賢以劉爲最然陳正不近名程死不渝志凜然端介士矣以是宣

主德遵

簡書夫何媿焉

兩關部使

何思字慎之直隸雄縣人嘉靖壬辰進士丙申以工部主事司樞南關清慎在事纖微不淄嘗假武林驛一名刺匣濱行亦檢還之其脩潔兢兢諸類此潘鎰字希平直隸婺源縣人以進士爲南京戶部主事嘉靖二年來董北關商稅政尚寬簡商旅頌戴查解額外餘課大裨 國用輿論迄益賢之

鄔紳字佩之直隸丹徒縣人以進士爲南京戶部主事嘉靖十年司稅北關清省漚職課銀惟主驗解餘無所濡湮允稱賢使

善曰司權使之漚浙也南關始成化辛卯北關始弘治癸丑皆浹歲瓜代迄茲其人多矣乃名蹟茂振者法當竝書而攷之二署故籍南志具名氏官位靡及行事北志稍稍及之亦匪周詳在今有無徵不信之患卽余所睹近使賢者又皆限於義例不可漫叅簡牘用是董取曩昔所聞者其一二云

江浙行省平章政事

李文忠字思本盱眙縣人丙午年八月統天兵來平江浙杭守將潘原明封府庫籍軍數以降忠入城撫安民庶下令擅入民居者斬有一卒犯法因磔之以令于衆內外帖然不復知更革事器量宏偉沉毅過人力戰多智嘗身先士卒勝則以功推下及釋兵家居恂恂若儒生軍府之事一無敢預論功加榮祿大夫浙江等處行中書省平章政事善曰當元氏之末國亂無政郡民更完者帖睦之虐痛於水火重以張氏淫刑苛斂疲瘁極矣岐陽王總師臨境守將欵附令嚴惠敷市不易肆人不

知兵何其德厚哉夫伯顏不擾且嘗秩廟祀若岐陽者可無報乎

潘原明直隸泰州人初與張仕誠輩以鹽徒起爲浙江行省平章守杭城歲丙午李文忠師至錢塘原明見機識時明於去就以全城歸款兵不血刃民免鋒鏑有德於杭民甚鉅仍授浙江行省平章

參知政事

朱亮祖六合人元義兵元帥歸國累功爲廣信衛指揮使從李文忠下浙江率兵攻桐廬降其僞將遂合兵圍餘杭下之至杭州協謀降潘原明陞浙

江行省參知政事副文忠守杭尋討方國瑛于台州方明善于温州俱平之後封永嘉侯

蔡哲字思賢湖廣武昌人洪武二年浙江行省參知政事才優經濟識達機宜遇事非非辨裁犁然中綦用法平恕惠流民悅

浙江左布政使

安然字資善河南柘城縣人洪武十年任浙江左布政使敦崇禮教以革姦頑爲政不事紛更務以德綏人凝重安和與民休息得旬宣之體十一年秋海潮嚙江岸爲濱江病然躬率丁夫伐石砌築隄

成而民以安居其他善政尤多既去父老歌思之
王鈍字士魯河南太康縣人博學多識廉潔無私服
食簡朴澹如素士洪武壬申授浙江左布政使時
江潮橫溢岸圯漂溺民居鈍率民伐石捍江民免
昏墊丁丑夏旱苗槁鈍齋沐徧禱甘雨隨注體國
憂民不遑寢食又建言恤竈至今論鹽政者賴之
辛彥博山西汾州人永樂十三年擢浙江左布政使
一宅心平恕不事苛急耻矜炫以平聲譽時吏治多
尚操切而彥博卒用寬和爲名得吏民心及卒于
官浙民歌思之

善曰當 二祖時藩臬吏無敢有通事者以法嚴
令具所司爭爲操切故也乃辛公卒用寬和爲名
豈亦 聖朝之黃次公乎

黃澤字敷仲福建閩縣人永樂壬辰進士官德二年
自山東右布政轉浙左使正直不阿勤慎精恪體
國恤民語及利病輿革言多侃侃奏罷無徵米六
十萬石停止溫處二府平陽麗水等七縣銀冶歲
額銀九萬兩以紓民困浙人迄今賴焉在任九年
劾罷不職郡縣吏五十七人奸黨交騰謗議竟坐
落職

善曰公在治奏罷無徵米六十萬歲停銀治銀九萬其施德於浙民厚矣卒以罷去何也公爲方伯劾罷不職郡縣吏五十七人怨之府也以公一人豈能勝五十七人之口耶忠臣謀國不計其身公無愧焉

孫原貞名瑀以字行江西德興縣人永樂戊戌進士正統八年來爲浙江左布政誠信愛民忠勤體國時處州盜起發兵勦捕軍需旁午列郡騷然原貞經畫有方供應不愆事集而民不病地方賴焉盜益昌熾乃進拜原貞副都御史督兵深入戮其渠魁羣盜悉平拜兵部侍郎進尚書其孫需爲浙憲使及左右使皆有聲仕終南京吏部尚書

李顥字思誠廣東博羅縣人正統丙辰進士累官浙江左布政使矢心貞白性復簡易政尚安和民甚德之陞工部侍郎錢塘江溢壞隄顥受命來治語在事紀

余子俊字士英四川青神縣人景泰辛未進士成化初陞浙江左布政使凝重簡默外和內嚴正不詭俗廉不近名有大臣風度才思敏贍凡章奏案牘援筆立就嘗曰人臣事君當隨事盡力凡有樹立

卽近且小亦必爲久遠之計故政切爲民興利除
害不遺餘力惜在浙未久旬宣之猷不可槩見其
撫延綏鎮榆林具有偉績語在名臣錄中每日大
臣謀國遇有大利害當身任其責豈得養交市恩
爲遠怨自全之地世皆服其名言仕終兵部尚書
贈太保謚肅敏

張瓚字宗器湖廣孝感縣人正統戊辰進士初爲寧
波知府有政聲成化中任浙江左布政使才識明
達慷慨有爲刷蠹釐奸不遺餘力藩政肅然陞漕
運都御史

劉璫字廷信福建南平縣人天順丁丑進士成化六
年任浙江左布政使公平正大治體精明燭奸革
弊吏不能欺凝重潔白卓有大臣風度仕終工部
尚書太子少保歷官四十年敝屋蕭然

劉大夏字時雍湖廣華容縣人天順甲申進士弘治
五年擢浙江左布政使公忠廉潔正大和平躬約
嗇以紓民困釐奸剔蠹藩省燕然孜孜奉公保民
如子雖德望冠天下而居之以讓有古大臣風事
苟當行未嘗洩露間欲質所疑於下吏不以公移
顯行毋折簡咨詢署名紙尾人感其誠意無不單

竭心力莫有欺者仕終太子太保兵部尚書受知
孝廟 朝廷諸大建明多所裁定語在名臣錄
中立朝時人稱之曰憂民如有病見客似無官此
爲得其實云卒贈太保謚忠宣

林符字朝信直隸吳縣人成化丙戌進士十四年任
浙江督糧右叅政尋進爲左右布政使德器老成
操履潔白坦夷質直不僞色詞爲政罔峻刑威而
法亦不弛弘治末以老乞休加陞右副都御史致
仕

李惟誠直隸蕪湖縣人成化甲辰與弟貢同
進士俱有才名時號江東二李弘治末任浙江右
布政尋轉左明粹廉貞不矜貴勢工詞翰多諷咏
銓推巡撫寧夏都御史逆瑾怪不入賂矯 旨勒
致仕

善曰自孫太宰而下若肅敏忠宣多顯績異狀餘
皆躬潔白以尹百僚今行惠施皆於法可紀也故
歷敘之

吳彥華字汝和南京旗手衛人成化辛丑進士正德
九年來爲浙江左叅政尋進左右布政使廉正守
法政尚安和孜孜奉公耻以貨自汙饑至死不變

疾且革謂妻子曰吾未有施於浙旦夕且死若卽
奉喪以行予目乃瞑苟遷延道左希賜贈以愧予
身後予乃弗瞑及死妻子奉遺命不數日卽行賻
奠一無所受嘉靖初其子在京庠餽粥不繼提學
御史山陰蕭鳴鳳爲贖田贍之

善曰節士之自衛一至此乎當臨命時氣息僅存
猶諄諄戒妻子懼身後賙贖得以愧其生平蓋所
謂矢死不渝也彼身爲不義者獨何心哉

王懋中字與時江西安福縣人成化甲辰進士初名
中立憲廟爲易今名正德八年任浙左轄才優

量偉遇事敏爲不與同列咨議右轄任鑑雅不與
較時人兩賢之政行而民不擾踰年擢都御史巡
撫雲南尋謝歸創心遠堂以見志越四年己卯宸
濠作亂協謀助義王守仁上其績起撫南畿尋進
右都御史掌南院致仕

善曰左使之於右使猶左右手也彼持籌握算指
揮擘畫皆一手所擅安事左手耶然左使意在攬
柄恒失之專右使不得分猷難免於忌未有能平
者矣今王之與任忘形爾我以善相成是王固難
而任尤難也若兩賢者豈相及哉

方良永字壽卿福建莆田縣人弘治庚戌進士正德
十年任浙江左布政使性堅正不與時浮沈故施
未通方而守官謹愆其論錢寧鬻鈔事語在事紀
因謝歸嘉靖初起爲應天巡撫都御史未幾轉侍
郎進南京禮部尚書致仕

善曰長老之論方公多惜其拙於政理予謂錢寧
一疏直聲震天下身幾不免此智巧者所不能爲
也且彼雖拙於謀已而長於濟民故身退而名益
重焉豈所謂大智若拙者耶

天衢字道亨湖廣道州人弘治丙辰進士正德中

遷浙江按察使器度恢廓性復耿介憲體明練裁
決如流吏民畏服居久之遷右布政使已而轉左
湔刷宿蠹藩政一新當是時鎮臣卑真潛蓄異謀
黨於宸濠圖策應先爲期藩臬諸司以昧爽下操
天衢與御史張縉協謀竟不果行後因大會真詰
責諸司以失期狀天衢抗論不撓詞嚴義正衆倚
以爲重真謀大沮方諸司之入見也縉命郡守留
志淑伏兵府外因以兵脅執其左右併其蔽甲故
真竟不得逞屬武皇駕將南巡中貴張忠者先
驅過浙欲三司庭謁天衢率衆升其堂忠不爲禮

遂長揖而出衆咸危之天衢曰予昔官臺中尚輕
七尺以犯瑾今老矣豈能以尺寸組爲宦豎屈耶
聞者壯之仕終工部侍郎祀名宦

善曰當武皇時中貴人是士甚裾何公獨卑視
之抗論不屈畢真寢謀升堂長揖張忠奪氣一時
倚以爲重民賴無恐傳曰猛虎在山藜藿不採信
然哉

劉節字介夫江西大庾縣人弘治乙丑進士嘉靖六
年任浙江右布政八年轉左才識明達遇事便敏
而性復強毅練習政體法嚴而弊革省中肅然文

學素優初以省元擢上第董學兩省詩法唐文宗
左氏仕終刑部侍郎

顧璘字華玉應天府上元縣人弘治丙辰進士少以
詞翰推與劉麟朱應登並有才名號江東三才正
德末任布政司左叅政豪邁高爽恢弘博大材器
敏練臨事剖答如流胥吏畏服與羣僚擘畫天下
事談議灑灑風生四座璘言峻行直每以豪傑自
負嘗欲辭官歸養又忤當道被論家食嘉靖八年
復起爲浙江左布政使綱紀羣吏斥絕奸頑出納
平允嚴戒胥吏不得收羨餘由是積蠹盡釐藩政

肅清仕終工部尚書

善曰予猶及見顧公之爲人閱弘吏理高議古初博雅好脩之士也今白下諸公猶盛推公爲能言云

朱裳字公垂直隸沙河縣人正德甲戌進士嘉靖甲申任浙江按察司副使轉督糧叅政左布政使清苦絕俗單篋赴官位至方岳裘褐不備婦荆布不完守法冰兢門無請託簡朴質素不矜炫功名以邀聲譽故事藩司多以曆誌互易市物雖賢者不免裳悉罷革嘉靖中任河道都御史 皇太后梓

官南祔道經山東裳董除道過瘁暴卒七級闡

善曰詩云彼其之子美無度若朱公者庶幾於無度乎彼末俗澆靡動以車服相矜高刺紋鏤丹惟恐不華是爲習奢者立赤幟也賢乎公垂蓋亦晨天之景星爾

文明字用晦錦衣衛人正德丁丑進士嘉靖十六年任左布政使砥礪廉隅不以塵介自縉陞南京督儲都御史不市一物行李蕭然仕終工部尚書

李默字時言福建甌寧縣人正德辛巳進士嘉靖丁未陞按察使攬轡登車澄清百度安舒閑雅冲粹

有文時人高其標韻踰年進右布政使尋轉左仁
和張濂時爲選部郎舉默爲南京大司成廷議翕
然仕終吏部尚書

胡松字汝茂滁州人嘉靖己丑進士三十九年任按
察使晉右布政使素負經濟遠畧凡兵防國計吏
治民瘼皆具石畫自奉敝衣惡食蕭然不異寒士
耆年宿德班行增重風厲郡縣首舉守己愛民二
事告諭惓切多感奮思勵仕終吏部尚書

右布政使

滿復周山東章丘縣人器宇端重通經史練達事要
元末政舛亂獄滋豐民苦煩苛縣舉復周爲亭老
平心率物里中樂其不煩 國初以人材徵授浙
江右布政明習吏理政尚安和聲績大著居七年
以目耗解職歸

艾瑛陝西隴州人儀貌魁嶄器宇深沉人莫測其涯
涖咸曰隴西艾生遠器也永樂己亥州守以瑛薦
成祖一見竒之超拜浙江右布政自布衣爲方
伯前此所無益自感奮甫下車卽詢民所利病興
革無遺旬宣所部政平惠敷民大悅初藩司公署
及杭學文廟悉燬于火瑛命有司重建興舉大役

而民不告病所以柔之者有素也宣德乙卯以九
載秩滿去卒年四十九

善曰 國初以不次錄賢故有以布衣亭老超授
方伯者此 聖祖勵世之操柄也真才異能相望
輩出豈偶然哉

張憲字廷式江西德興縣人成化辛丑進士弘治中
任浙江右布政操履精白持身雅正威戢奸吏而
惠撫疲民所部皆畏懷之正德初以都御史來浙
清理鹽法能禁戢中貴近習不敢恣橫仕終南京
工部尚書

徐源字仲山直隸長洲縣人成化乙未進士弘治丁
巳任浙江右布政使檢身脩飭持論堅正歲大比
諸生源職提調拆卷時所取多儒士御史難之欲
有更動源抗言曰科場本以文取人豈問爲何許
人耶文苟入彀卽通榜儒士固無傷也其不爲詭
隨若此仕終左副都御史

雍泰字世隆陝西咸寧縣人成化己丑進士弘治初
任浙江右布政性剛介質直不撓貴勢浙西無賴
亡命販鬻私鹽者幾至千輩盜竊公行皆恃豪大
家爲倡泰先捕豪大家置諸法羣盜解散湖州以

水災捐賦勢家欲專惠一已泰悉按致之均惠予
民其諸擊好貪以肅藩政斥羨餘以便輸納罷興
作以節浮淫皆其治行之卓然者仕終南京戶部
尚書不容於逆瑾逐歸時流賊將劫至其村泰挺
身出諭皆嚙指相告曰清官也遂引去

周益中字時可江西廬陵縣人生有異質年十八卽
勵志聖學講學白鹿洞從遊者恒數十人成化己
丑進士弘治十一年任浙江右布政使凝重莊嚴
不妄言笑下吏對之恒凜凜權璫懾不敢蹈故
武居奇利仕終副都御史致仕所著有畏齋集

善曰我 孝皇朝天下可謂無事此三數公者復
為右使益無奇績可見然張公廉而正徐公直而
公周公端飭而介斯皆可以尹百僚矣予故論敘
之

邵寶字國賢直隸無錫縣人成化甲辰進士弘治甲
子任浙江按察使貞介溫厚以文雅飾治法比精
明聽斷惟允轉浙江右布政使嚴革秤頭火耗以
勵官常清戒不假刑併人自輸服時中貴議開處
州銀礦寶力言曰利者民之所趨雖重法禁之而
人情見利不見法啓盜媒爭得不償失故曰罷議

便卒罷礦議仕終南京禮部尚書卒謚文莊

安惟學字行之山西臨汾縣人成化甲辰進士正德三年任浙江右布政為政公清疆介不偽色詞馭下嚴明皆相戒莫敢為非遷副都御史撫寧夏值安化王反首被害以持法過嚴下吏多媒其短未經褒贈時論悼惜

蔣昇字誠之廣西全州人成化丁未進士正德中任浙江按察使轉右布政使純誠無偽於世局機數一無所知及臨政斷獄洞察下情直枉立判任臺憲鋤奸薙惡風裁凜然至為右使政尚寬和旬宣惠愛人比皆稱其得體

湯沐字新之直隸江陰縣人弘治丙辰進士正德十一年陞浙江右布政使操履貞白持法堅定人莫敢以私干之雖居右轄而剔蠹鋤奸屹著風采為庶寮所尊憚仕終大理卿

孫祿山東棲霞縣人弘治丙辰進士嘉靖二年任浙江右布政性骨鯁素以是齟齬於時守官甚貞即權貴撼之不為動初為兵曹郎忤逆瑾意遂遭廢錮晚節任藩司操執愈勵人皆壯之仕終應天府尹

善曰正德以來爲右使者三人安以果蔣以誠孫以介雖志操不同均之良吏也於法得並書云

馬卿字敬臣河南林縣人弘治乙丑進士嘉靖二年擢浙江右布政丰姿凝重性度閑雅政先節儉守正不阿裁抑中官織造靡濫爲所誣奏逮赴詔獄責數秩爲鶴慶軍民知府已而起謫籍至副都御史總督漕運卒于官

邵錫字天祐直隸安州人正德戊辰進士嘉靖十六年進浙江右布政使亢厲守高風節峻整人皆畏其嚴正奸宄屏息仕終順天府尹

左叅政

黃勉江西浮梁縣人永樂六年任浙江左叅政惠養所部不瘠民以充上供時徵柳箱青器非杭所產奏請罷之民歌其德以秩滿去

饒禮江西南城縣人由國子生以姿貌言詞授御史擢浙江左叅政在臺中秉道嫉邪以嚴立見憚及官浙省乃更爲愷悌仁恕政尚寬和勤恤民瘼綏柔保釐吏民皆愛戴之陞河南左布政使去

韓雍字永熙直隸吳縣人正統壬戌進士天順末以兵部右侍郎左遷浙江左叅政雍少負才名雄俊

爽闇雖風格峻整而表裏洞澈發奸摘伏人畏之若神明既之官吏告以當行部浙西徇所專治雍叱曰吾叅藩政凡事皆所當問豈區區三府事哉練習政體曉暢民情黜奸貪理寃滯均徭役平市價恩威大著後節制兩廣赫著風績語在名臣錄中傳又記其臨戎蒞政若豹變鸞搏摛詞灑翰若曰生泉湧庶幾文武全材云位終右都御史謚襄

胡

字世甫陝西奉安縣人正德戊辰進士嘉靖任浙江左叅政爽朗開通多大畧精明吏理

指顧揮霍間庶務咸集禁暴戢奸法嚴令具浙西爲所部按屬凜凜嘗突至郡邑周視庫藏親錄繫囚下吏無敢飾重鈞囚無敢脫械繫然以明察忤物情竟被飛語左遷仕終副都御史

盧蕙字子貞直隸山陽縣人嘉靖癸未進士十六年擢浙江按察司副使體貌魁岸人望之不敢媒適嘗署學政加意風厲士論翕然稱之進左叅政當官重惜法紀不徇情縱舍屬邑吏有以賄敗者人多以甲第憐之蕙獨無所寬貸竟褫其秩邑人稱快仕終副都御史

善曰予於叅政中猶及見天水山陽云天水誅文而不失實山陽好斷而敏於事此兩公者皆所謂快吏哉

右叅政

趙徂字雲翰山西夏縣人徙祥符由太學生洪武間擢浙江布政司右叅政時島夷繹騷爲瀕海患徂督兵往討設竒制變會斬無算境內救寧明達多智有經濟幹畧每臨事運籌石畫井井諸所興革務垂文遠民皆德之仕終刑部尚書初徂在襁褓時母抱持避寇林莽間猝遇虎警置于地虎熟視

而去聞者異之及長英偉多才善屬文一上諷諭事五朝多所裨益雖貴至九列自奉如寒素善曰語云貴不期驕徂仕至六卿貴矣而奉身僅如素士彼其心之所存遠矣哉末俗澆侈至有初第進士遂華輿服者嘻亦陋矣

俞士悅直隸長洲縣人永樂乙未進士官德間擢浙江右叅政練習政體勤幹有爲精明辯察洞見微曖人莫敢售其欺至刑部尚書

夏寅字正夫直隸華亭縣人正統戊辰進士成化癸卯擢浙江右叅政處州民苦虐政走山谷當路者

恐其爲變招之輒大譟曰須夏參政來寅乃馳檄
撫諭之卽解散宅心易直爲政敬簡有容節浮崇
本處事不近名當官無朋黨爲郎者二十年爲副
使者十六年不以屑意嘗曰君子有三惜此生不
學一可惜此日閒過二可惜此身一敗三可惜
善曰傳稱隨會善弭盜盜潛奔楚夫彼崛強山澤
間教化所不能馴一聞夏公檄輒解散孰謂盜不
可化誨哉政信於頑民化行於強梗若夏公者今
之隨武子矣

陸容字文量直隸崑山縣人爲人堅正敢直言初爲
兵曹郎以直道忤貴近弘治元年任浙江右參政
愛法紀振士風宣序民事俾各得其理毀淫祠表
先哲以維世教與人耿介不苟合竟被搆而去士
論惜之

善曰文量始爲郎直道不容於時及宦浙竟不得
志而去蓋始以是來終以是去也語曰善仕不如
遇合諒夫

羅鑒湖廣茶陵州人成化戊戌進士弘治十四年陞
浙江右參政溫良樂易事無詭隨爲政寬而有制
雖不以矜炫立名而德器近人可親累官副都御

史劉瑾索重賂不應遂落職家居二十餘年年九十雙瞳炯然與人處雖僕隸亦禮下之誠長者也善曰人言鑒長者其拒瑾一事非謹愿者所能爲也予幼時見鄉先生言猶及與鑒交稱其如飲醇酒不覺自醉云

馬紀字直卿河南鈞州人正德丁丑進士嘉靖二十一年任浙江布政司右叅政操持堅定強立不撓愛護小民保之若子而嫉惡奸貪若寇仇然所部畏其嚴明豪強斂戢貪墨者不得肆郡二千石有與紀同年者亦悚然憚之遇事不平輒力爭或已志不伸輒忿懣累日竟疽發背卒

左叅議

周期雍字汝和江西寧州人正德戊辰進士嘉靖初陞浙江左叅議政體練達法比精明每行部輒洗冤釋滯多所平反狴犴爲之一清已而進督糧叅政嚴檢察勵官常漕政肅然諸爲奸利者不得肆仕終刑部尚書

按叅知居鄉不爲物議所滿今取其宦浙名績紀之他不繫計云

右叅議

武達字仲道山西大同縣人以鄉貢起家宣德壬子擢布政司右叅議老成練達政務寬仁行部郡邑

輒旁咨民隱有利弊當興革者奮然有爲勤宣
上德勞來不怠吏民皆親愛之歷任九年陞廣西
叅政後致仕過杭聞雲中有警留杭不去遂家焉
歿葬錢塘洪度山魏文靖公表其墓見祀名宦
張敷華字公實江西安福縣人天順甲申進士成化
中任浙江右叅議分督處州銀冶方毅介直風槩
凜然洞悉下情撫綏凋瘵得旬宣惠養之實每歲
徵及時不事刑併而民更樂輸賢聲蔚起景寧礦
盜竊發衆議大發兵誅之敷華曰是赤子弄兵潢
池耳撫之便乃執渠魁十二人寘于法餘悉無所
問羣盜解散四境以寧德器凝重操履端潔爲一
時縉紳之冠仕終左都御史與華容浮梁叶心
孝皇朝並爲名卿卒贈太子少保謚簡肅
善曰詩云君子如祉亂庶遄已張公一發言議撫
而羣盜免死者數千德至渥也奕世而下衣冠蟬
聯固爲善之報哉

韓鎬字民瞻河南盧氏縣人成化庚戌進士任給事
中弘治初陞浙江右叅議時大旱民饑攘食因聚
衆爲盜鎬行部至金衢以恩義開諭盜悉解散尋
發倉賑之浙東悉平進右叅政先是濱海諸郡歲

發輸沿海諸倉粟以百萬計解糧者盜入已駕言
海波沒溺至是鎬曰海神乏食久矣何見奪之數
耶廉得其實致之法已又擢右布政使海鹽塘決
數千丈鎬命卽仍舊石修築停追餘銀數千緡以
給工費仍檄濱海田戶當決衝者每田若干頃脩
塘若干丈立法簡便周盡不三月工成歷官副都

御史

祝鑾字鳴和直隸當塗縣人正德戊辰進士歲庚辰
擢浙江右叅議翩翩文雅以儒學飾治持重端凝
政無隙紊每休沐輒研精簡編或爲聲詩考古析

疑孜孜不息居久之遷福建巡海副使去

善曰繁文妨務虛僞亂俗祝公以簡局得肆情於
披吟此良非訓哉有識之士不當以吏事爲溷濁
矣

姜儀字君肅江西南昌縣人正德甲戌進士嘉靖八
年任布政司右叅議忠勤體國慈惠恤民愛養
所部撫之若子每興革利弊不動聲色而事集民
安人咸德之仁厚清介有大臣風仕終巡撫副都
御史

善曰語云清吏多刻介嘗忤物其不然哉姜守已

廉處事平興革在民而民不知斯真良吏矣
柴儒字伯真陝西白河縣人正德辛巳進士嘉靖癸巳擢布政司右叅議剛正明達臨事勇爲持已甚介而接人以和行部列郡務搜剔奸蠹諸爲民害者悉釐正之豪強屏迹貪墨者無所容後以憂去民恒思慕焉

浙江按察使

王良字天性河南開封人革除間以刑部侍郎左遷按察使壬午聞變舉火闔室自焚語具事紀祠廟中正德十三年提學副使劉瑞謀諸憲使梁材卽臬司東南構忠節祠設王春秋祀之與岳祠並萬曆二年副使王績之又增設夫人主

善曰王公之死建文正也乃其婦獨先委命何其壯哉夫也死忠婦也死義千載游魂有光臬署矣周新字志新廣東南海縣人永樂中官御史彈劾不避貴戚憚之呼爲冷面寒鐵公居數歲擢浙江按察使浙有寃民間命下喜曰吾生矣冷面寒鐵公來也及新至果直其寃一日視篆忽旋風吹異葉至吏言城中無此木獨一僧寺有之去城稍遠新悟曰此必寺僧有姦利事命駕卽往於樹下掘

得婦人尸一鞫卽服有一人久商於外持重貲歸未抵家而日暮恐爲人所圖潛以其貲置一祠石下至家妻問之告以故明日求之無有也往訴之新新曰是必而妻有外遇也逮至果然蓋歸語妻時私者竊聽先往取之矣併按論之又有訴爭雨傘者甲曰我傘也乙曰我傘也新命剖之各持半去陰使人躡其後甲曰我始欲助汝半價庸非汝利乎乙曰本吾傘也安肯以半價屬汝由是遂抵甲罪境有虎患爲文告於神湏臾得虎格殺之初行部時有蠅蚋聚馬首尋迹而至見一暴尸惟小

大布印在傍他無可勘還乃令人廣市布得印誌同者鞫之卽刼布賊也其發奸摘伏類此始乘傳將至浙屏去騶從以微服行屬縣觸縣吏怒收繫獄中與囚語盡知一縣利弊明日迂者至乃自獄出縣吏蒲伏請罪竟以罪去錢塘令葉宗行素號廉能新私入其居偵之他無所有惟笠澤魚腊一束其家所寄者也袖少許出明日召葉飲出腊示之葉益砥礪他令皆相戒莫敢爲貪僚友一日餽鵝炙懸於室後復有遺者指示之貴至三品妻猶荆布與同官內子宴盛飾而往見之輒慙更爲澹

素嘗斥西湖以備旱諸雄據於豪大家者皆奪還
貧民由是勢家交怨竟爲錦衣指揮紀綱所陷濱
死矯矯無片辭撓詘語具事紀中未幾紀綱以罪
誅 上尋悟其枉嘆曰廣東乃有此好人屈殺之
矣他日見若有人被朱袍立庭中 上問爲誰對
曰臣周新也上帝以臣剛直命臣爲浙江城隍爲
陛下治奸臣貪吏言訖不見今杭人率以五月十七
日祠城隍爲其始生之辰云

善曰予爲兒時在里中間長老傳周公事甚悉言
人人殊大都發奸健吏也其出腊事類黃霸懸灸
類羊續致虎類童恢若諸申冤証死等事則如釋
官家所指目爲包孝肅者是已夫周公爲城隍事
甚惟語不經然郡中率嚴祀之有徵應豈誣也哉
語曰生爲明吏沒爲明神如公之德廟食百世可
也

王玘字孟石直隸安肅縣人洪武二十九年由監生
擢浙江按察僉事累陞按察使玘勤公恤民在官
輒咨詢吏與窮閭隱痛若癩厥身持憲公平風紀
振厲奸回屏息屬吏悚然憚之陞鴻臚寺卿

林碩字懋弘福建閩縣人永樂十年進士官德初任

浙江按察使振舉憲典爲中官所忌誣逮 詔獄
當 廷鞫時直辭不撓 上宥使復職語具事紀
中碩初被收衆皆危之旣見釋喜動中外咸頌

聖德云

柯暹直隸建德縣人由舉人正統中擢浙江按察使
初暹本以建言觸忤權貴繫獄三載直聲震天下
及來浙人多憚其威名乃持法平允務存大體不
瑣瑣苛察以誅細尤令嚴惠敷所部皆畏懷之其
草書詩文亦爲世所珍貴云

軒輓字惟衡河南鹿邑縣人永樂甲辰進士正統間

陞浙江按察使耿介方嚴風采稜厲守官廉潔常
俸外雖一介不以自緇朝夕惟蔬食四時一布袍
與故舊賓客共飯未嘗重肉嘗爲令約諸僚佐曰
不三日不得食肉食肉不得過一斤同列多不能
堪以是搏擊豪強刺舉貪墨一無所貸部內凜凜
至有投牒引去者然頗以廉自矜飲同僚家歸輒
指其腹曰此中皆贓物也論者以是少之聞親喪
卽時就道同列有未及聞者嘗耿九疇爲兩淮運
使一時並稱廉吏云仕終左都御史總憲南臺赫
有威望爲世名臣

善曰語云介不忤物貞不近名軒之指腹忤物矣然以此擊貪殘吏部內凜凜奸猾者望風解去所謂良臣如猛虎高步曠野而豺狼避路豈不然哉陳璇直隸定遠縣人正統間代軒輓爲浙江按察使持憲庇民以多忤被誣黜尋復原職語具事紀中曾蒙簡字以行江西泰和縣人正統乙丑進士天順三年任浙江按察使練習政體洞暢物情聽讞精明臨機立斷同列皆斂手讓之蒙簡以家學擅名一時詩文書法爲士林雅重錢塘僉事王琦者廉吏也旣卒棺衾不備蒙簡與布政秦敬代爲賙斂人高其義

李敏河南襄城縣人景泰甲戌進士授監察御史陞浙江按察使明習憲紀性復謹厚臨下不峻威嚴政先仁恕未幾以憂去仕終戶部尚書卒贈太子少保謚恭靖敏爲人長者與人交怨怒不宿久而彌親其督漕兩淮尤多惠政云

劉鈺字仗和江西安福縣人球之子景泰甲戌進士成化初任浙江按察司提學副使精鑒得士科條肅然由是兩浙儒風丕振歲辛卯遷本司按察使或曰劉使君翩翩文士非法曹長也及臨政洞悉

下情聽讞明允剖疑發隱庭中稱平論者乃服未幾爲權奸所忌以不謹罷時論駭然語具事紀中善曰劉憲使忠愍公子也忠愍公一代蓋臣以直諫死二子皆賢故所至遂著聲績若憲使足稱忠愍子矣雖以考黜奚損哉

楊繼宗字承芳山西陽城縣人天順丁丑進士初知嘉興府有異政歷九年擢浙江按察使性鯁直不阿權倖嚴於惡惡聞中貴人近習有不法者輒按致之市舶林太監積不能平因燕會以微文譏刺令各自言畏與不畏繼宗倡言曰最所畏者賊穢

所不畏者內臣林爲變色每朔望大會僚佐指天誓曰衣冠祿食而受賄徇私不得生還故里南有錢塘北有揚子其何能渡聽者悚然貪墨吏望風引避豪右斂迹以內艱去任夜聞訃比曉已在十里外一蒼頭負衣篋去矣始知嘉興府御史孔某按部笞殺人繼宗榜路衢來府謁訴後御史突至府將有所按繼宗引入臥室空無所見惟一敝篋貯故衣數事律數卷而已御史亦嘆服而去其諸耿介多類此張寧嘗曰昔楊震稱清白吏尚暮夜有持金登其門者承芳則無也其廉聲直氣滿天

下中官怙勢如汪直者威靈縉紳尚對 憲皇曰
天下不要錢惟楊繼宗一人又以硬漢子稱陳選
云

善曰當 憲皇朝楊公廉直高天下人至畏惡其
嚴不敢與見 至義烈矣始守嘉興時政行尤卓
伐奸誅暴事種種不可縷載余姑列其大者爲世

箴鑑云

戴珊字廷珍江西浮梁縣人天順甲申進士成化乙
巳任浙江按察使德性溫粹洞無城府而持身耿
介不以公法徇人決獄如流庭無滯讞雖法比精

善曰當官筦鑰不嚴而家衆或關通吏卒此法所

繇弛謗以之興者也王公最加慮及此信法去文哉

席書字文同四川遂寧縣人弘治庚戌進士正德癸

酉任浙江按察使才具無人明習法令爲政不務

近小多恢擴大畧而敏事達機長於應變洞微燭

賧吏不能欺嘉靖初以議禮受知 世宗擢至少

保禮部尚書武英殿大學士卒贈太保謚文襄

李承勛字立卿湖廣嘉魚縣人弘治癸丑進士父曰

田成化中爲浙江右布政以廉平著稱越三十年

爲正德甲戌承勛來爲浙江按察使值歲大饑承

勛倡議發倉賑粟民咸稱之曰觀察生我少負瑰
瑋與胡世寧魏校俱以氣節相許及世寧列上宸
濠事狀間道赴京有 旨逮捕赴 詔獄邏者滿
道時承勛適爲按察使保庇之力爲多義烈震天
下嚴毅慷慨憲度貞肅爲一 旨偉人仕終兵部尚
書在本兵時重惜名器多所建罷卒贈少保謚康
惠

副使

裴承祖湖廣荊州府人國初任浙江按察司副使治
獄平恕不事苛刻擢江西按察使

周敏字好學湖廣沔陽州人永樂中任按察司副使
精敏有爲遇事立斷每訊鞫洞晰下情剖決允當
狴無滯讞人服其明永樂十二年以秩滿去

李素廣西蒼梧縣人任監察御史陞浙江按察司副
使臨政不事鉅筭而發隱摘奸敏於得情聽讞之
時片言立斷真快吏也秩滿陞湖廣叅政

魏源字文周江西建昌縣人永樂丙戌進士擢監察
御史陞浙江按察司副使體貌嚴重明習政體庶
獄詳慎下吏有讞決不當者輒面加詰責然心無
凝滯繼以事來議卽溫顏遇之以是吏輸其誠人

服其量仕至刑部尚書獄多平反奉命督察諸將經畧邊務咸中機宜以足疾辭歸卒于家

陳鑑字有戒直隸吳縣人永樂中進士繇御史陞浙江按察司副使用法寬平臨事簡易民信愛之宣德間特擢副都御史鎮陝西聲實愈著尋晉左都御史掌院事卒謚僖敏

嚴孟衡江西分宜縣人永樂乙未進士宣德間任浙江按察司副使剛方毅直堅持法紀人莫敢以私干之貞度肅僚貪墨皆望風引避論時政利害侃侃不阿於人少所許可同列咸推其才頗多以嚴

見憚云

趙禮河南洛陽縣人永樂壬辰進士初觀政臺中輒著風節宣德間陞浙江提學副使守身舉正品鑒精明時周璇姚夔尚未知名禮獨首拔之稱爲偉器後二人皆大魁天下而姚復爲名臣其明於知人若此

善曰自周公而下雖不著奇節然李以敏魏以量陳以簡嚴以毅趙以精品鑒各以所長顯遂著仕籍皆一時之彥哉

許銘江西南昌縣人永樂四年進士宣德初爲浙江

按察司副使持憲嚴明豪貴不敢干以私而興革利病民咸感服嘗上言備邊禦戎 國家重事理兵足食備禦大經近來邊軍困於雜役多致逃亡防守既踈屯種亦鮮若悉矜免專令備邊如舊給與衣糧其有餘力各遣屯田則食足兵強守固戰勝矣又言夷狄獸心難以德服其曰歸誠朝貢實皆慕利而來爵賞雖加反側難保宜加撙節防閑如 祖訓條章許其來朝者或三年五年一至其餘悉宜禁止則送往迎來免困民力府庫之財不至妄費矣 上嘉納之

楊瑄字廷獻江西豐城縣人景泰甲戌進士成化初擢浙江按察司巡海副使才猷駿發遇事敢爲先是瀕海塘隄屢圯海鹽地卑鹵當大海衝尤善決瑄至建議修築延袤二千餘丈塹山堙壑築爲大隄民數世賴之瑄嘗居臬署忽報倭船數百入寇同寮驚問瑄徐曰彼果來犯吾將盡誅之乃按部至寧波時守令已戒嚴召集民兵瑄曰海上軍兵自足今農事方殷急散之至定海數日乃知僅兩倭船入貢耳蓋瑄防禦俱探法素周密故臨事不爲蒼黃一嘗服其鎮定進按察使明察奸吏風紀

振揚及屬疾垂盡猶諱諱語海塘事民懷其德建祠東海上歲時祀之語詳事紀中始瑄以直言被杖瀕死謫戍直聲震天下逮瑄死其子源以五官監䟽逆瑾罪惡竟被杖死於道人以爲不愧瑄子云

善曰楊公有施於浙得世祀海上其爲捍塘法甚備蓋所謂能捍大患者也乃其子碌碌爲保章氏且死杖下何哉公本以直節奮遭杖幾斃其子則竟斃焉繼志殉忠增光乃父一死重於泰山殆不必以報施常理論矣

張文字存簡直隸泰州人成化丙戌進士己亥陞浙江按察司副使有齷齪李成誣販鹽者爲盜轉引至十九人多瘦死獄中存者僅六人及文至詰得其情立爲雪之六人者幸不死一省稱快人謂張使君胡不蚤來使此十三人者死於非辜甚無謂也文在浙多惠政聽訟決獄能以恕求情云善曰自法網日密善宦者多深文避辜同此十九人也彼十三人者獨先瘦死獄中向不遇張使君固以爲當死者耳誰能知而哀之嗚呼使君不一二見則世之爲十三人者衆矣

魏富字仲禮福建龍溪縣人成化丙戌進士授監察御史陞浙江按察司僉事進副使痛抑舞文禁止告訐有豪右誣構縣令陰事同列知其枉狀莫敢與雪事移於富富勘鞫得實力爲自之浙東江岸圯水啣民田富設方畧命修築石隄凡捍田若干頃歲饑賑貸貧民所活甚衆仕終刑部右侍郎

鄭紀字廷綱福建僊遊縣人天順庚辰進士弘治元年擢浙江提學副使姿貌英特風格峻整秉教鐸能以師模自尊學期用世爲文不務刻深明白條鬯正樂舞行鄉射毀淫祠以古道匡俗風教振起仕終南京戶部尚書

鄭陽字宗乾直隸安肅縣人弘治丙辰進士正德辛未任浙江按察司副使備兵溫處溪洞之民恃其險遠聚衆盜礦時爲邊患而沿海諸邑恒慮島夷竊發守備當嚴陽至卽簡師徒厲兵將時勤校閱務使士卒精強器械堅利威望赫著民夷驚服在治日海氛宴然二郡寧謐士民德之仕終陝西巡撫都御史

吳伯通字原明四川廣安州人天順甲申進士弘治三年擢浙江提學副使覃精百家尤粹於性命之

學嚴立科條以督諸士諸士亦嚴事之甄別精當
善獎進人如胡端敏孫忠烈秦從簡輩皆識拔於
疇伍中以國器期之後皆樹忠節以功德知名當
世

善曰文章以空言得士世之傲儻奇偉者難以此
槩之也乃吳學士使獨擅稱於時得士三焉固繫其
遭也哉

文貴字天爵遼東錦州人成化乙未進士弘治三年
任浙江巡海副使才器博大風度凝遠拔才將問
士伍練兵積儲建立墩堡以資備禦號令詳慎聰
名節自砥礪瑾方和國而宿獨不通餽謝遂勒致
仕後復起仕終南京光祿寺卿

彭澤字濟物陝西蘭州人弘治庚戌進士正德五年
任浙江按察司副使轉叅政澤爲人慷慨多大畧
臨政遇事勇於有爲而識旣精明才尤幹敏人皆
以經濟歸之明習法比不瑣瑣苛察而風紀振揚
下吏畏服後撫山東臨河洛屢平劇盜聲望赫然
仕終兵部尚書改左都御史掌院事在名臣籍中
徐蕃字宣之直隸泰州人弘治癸丑進士正德八年
擢浙江按察司提學副使問學雅醇操持端毅介

於奉法不爲貴勢所撓品鑒精核崇雅抑浮每進退大才士論允服任終工部侍郎

劉瑞字德符四川內江縣人弘治丙辰進士正德丙子任浙江按察司提學副使風采嚴重儀範峭整人不敢干以私好古執禮每以古道律人校士必先德行而文藝次之諸生中有孝廉之實者輒移文榮以廩祿士用知勸取士不拘一律隨才就造人人得以所長自見雖校覈或任訶察然論者皆誦其嚴明云仕終南京禮部侍郎

何瑋直隸如臯縣人始官翰林值逆瑾柄國諸

朝貴皆去媚事瑾瑋獨不往遇之甚仇瑾大憤乃出爲山西提學僉事解官歸久之起爲浙江提學副使丰采凝重威望凜然人不敢干以私至遇諸生恩意優厚如家人父子培養士氣使得以正身遠舉或有株連保覆甚備僚長諷之曰士習澆漓此殆可以法馭難以恩結也瑋曰彼非吾子弟耶柰何以徒隸遇之若蕩節踰檢吾有法在耳多士感其德化相戒無敢犯有司者及遷秩流行同官者設祖都門士初未集僚長以言激之曰士不可感化若是公初不用吾言今何如矣瑋曰吾固止

之非士薄也及酒行傾城士皆出走滿轂下塘曰
士不可感化若此哉以吾且去果不用吾命矣僚
長有慚色塘笑曰於事上而隆於待下故權貴遇之
爲節士貧士依之爲仁君若兩人然諸生中爲之
語曰先生猶渤心好脩類獨行和厚平易類長者高
明博夫蓋兼之矣餘具事紀

善曰始何公官翰苑見衆卑事瑾獨奮然長揖曰
安有天子侍從可輒拜人者乎瑾不能奪吾意
公矯矯者至其遇諸生何其溫也語曰惟不援者
焉能不陵信然哉

萬潮字汝信江西進賢縣人正德辛未進士嘉靖乙
酉擢浙江按察司提學僉事二年進副使仍董學
政轉布政司左叅政冲粹和平舒徐開雅望之鄙
各自消藻鑑精當所拔皆一時俊髦惇崇實學以
典斯文爲已任人知向方及叅藩亦多惠政民咸

誦之見祀名臣

公爲學子憲將有一二假託爲奸利者蓋公寬大不事嚴察非有私也

張岳字惟喬福建惠安縣人正德丁丑進士嘉靖己
亥任浙江提學副使學宗伊洛文有法程簡重端
莊善於廸士故所至皆服其化未幾轉浙江叅政
爲政博大周詳禁奸釐弊吏不敢肆仕終兵部尚

書見祀名宦

陸深字子淵直隸上海縣人弘治乙丑進士官翰林
克日講至祭酒抗言講章將進 御前宜各自陳
所見不容先送時宰更定以是忤柄臣意左遷延
平府同知再擢至浙江提學副使端方直諒師範
嚴肅臨事持正議侃侃不阿好學秉禮務以身教
正文體黜浮華以興起斯文爲已任未幾陟去浙
士恒思慕之仕終詹事府詹事卒贈禮部侍郎謚
文裕

江文盛字希周湖廣崇陽縣人正德辛未進士嘉靖

九年擢浙江提學副使丰采凝重才識高明校閱
精敏品鑒悉當其施爲舉措夙然不群條範嚴肅
群士皆慄然憚之然能悉下情扶大體使人畏之
而知愛焉先是文體多瓊靡自文盛典學務去陳
言以作奇氣獎拔才俊文體一新凡經其識拔者
往往出爲名士人謂汪公之於文如伯樂之於馬
非虛語也杜請託抑奔競躁進之風爲之一變他
如建社學擇家師爲教讀法施於今猶因之督學
三年以內艱去仕終大理寺卿見祀名宦

魏一恭字道宗福建莆田縣人嘉靖己丑進士二十

七年擢浙江按察副使坐鎮四明而開府朱統以
行部至時有倡議于定海縣海島中築城且列置
戍樓者朱可其議一恭奏記曰是役非費巨萬更
再歲不能卒業而波濤撼激卽卒業亦難久徒勞
無益也計莫若已之便朱廼檄守巡偕一恭同歷
海壖睹形勢旣至朱指畫上下躍然抵掌以爲倡
議者言便守巡復從旁從史之朱廼以回視一恭
一恭持論益堅朱謂一恭好乖其計意不憚甚已
而朱復以大捷宴諸司一恭語諸佐吏曰海上幸
無事吾曹莫能效尺寸柰何以捷聞乎已而強從
宴宴時定海令具金花文綺自開府下至材官各
有差一恭獨麾卻朱目攝之一恭不爲意倨坐席
上爲之不怡者良久酒數行卽罷後廼以他事論
一恭疏發矣御史裴紳言魏有盛名劾且不信遺
騎從間道追還已進江西叅政歷廣東按察使山
東右布政使廣西左布政使俱有勞績未幾卒于
官一恭起自卑族刻意清約累宦行李蕭然平生
不苟取雖交際微物亦固卻察案多訾其形人之
短一恭行之不顧

僉事

潘奉先字輔之山西太原縣人在勝國官二千石元
亡引去 國初召拜浙江按察司僉事政尚寬和
不事察察疾俗吏以虛名炫實耻求人知在官六
年持法平允未幾以老乞歸

吳琳湖廣黃岡縣人 國初以博士薦 太祖知其
可任擢浙江僉事襟茂無華不厲聲色而憲度貞
肅風采奕然理鹽政恤竈通商防範嚴密私販旣
弭 國課益充仕終吏部尚書旣致仕 朝廷遣
使察之見一老者在田治稻使者問曰此處有吳
尚書者何在琳對曰吾是也使以聞 上益重
之

善曰富貴亦何常朝而簪紱暮而未耜可也今世
士大夫好以等威自尊卽無深衣里社者况力田
乎如吳公忘其鼎貴齒於老農雖行非中庸然其
去豪侈者遠矣予故論敘及之

劉宜正字季道江西吉水縣人洪武初以明經薦始
拜起居注遇事敢言首發御史大夫陳寧奸深爲
上所信重已而拜浙江按察司僉事宜正爲人端凝
詳審居安慮危諸所擘畫皆務爲經常可久之計
割裁幹敏卓有治才憲度脩明風紀振肅

善曰國史載季道從 太祖幸清流關應 制詩
有安不忘危之語爲 上所褒賞彼所謂憂治危

明者哉以是吏浙固宜爲斯民計久遠矣

裴璉字汝器湖廣監利縣人洪武中由太學生再擢
至按察司僉事政尚嚴明不撓貴勢鋤強輔弱所
部畏而懷之雪寃獄䟽淹繫庭中稱平至於甄別
人才作興士類尤所汲汲仕終工部右侍郎

化潤生字蘊玉福建邵武縣人永樂甲申進士宣德
八年任浙江市舶提舉邃於文學經生學士多詣
門受業正統三年陞浙江僉事提督學校剛方介
直師道尊嚴品校精明科條詳密年七十引年以
歸行李蕭然家居二十餘年風節愈厲自號介軒
有介軒集

熊鍊字學淵江西進賢縣人宣德庚戌進士正統間
擢浙江按察司提學僉事嚴立科條釐革宿弊其
造士以行誼爲先且明于知人甄別不爽諸所去
取士心允服在浙八年始以常調遷去處之恬然
仕至右布政使卒年七十七

王晟字景昭山東鄆城縣人正統丙辰進士擢浙江
按察司僉事專理山場銀課時麗水青田諸縣頑

民聚衆盜礦乘鄧寇之亂更相煽結流劫村落戾
募民兵往勦之殺賊數百賊更集黨二千餘分掠
近縣勢甚猖獗屢復提兵力戰衆寡不敵遂爲所
執罵賊而死事聞遣諭祭贈參議官一子

黃譽字廷永福建莆田縣人正統甲子舉鄉試第一
戊辰登進士授南京監察御史景泰四年遷浙江
僉事所至摧姦去暴號刻草黃材高氣烈人敬悼
之擢浙江參政改湖廣卒

沈敬直隸松江府人正統間任浙江按察司僉事提
身嚴甚持法不私官吏惴惴震懾風蹟振于一時
未幾引年去

辛訪字咨道河南襄城縣人景泰辛未進士天順間
擢浙江按察司僉事故事新官蒞任縣官爲設供
帳訪悉謝却爲人剛正不阿臨事侃侃能斷大議
處州頑民聚徒盜礦阻兵怙亂衆悉解散桐廬大姓連
訪執不可揭榜諭以禍福衆悉解散桐廬大姓連
姻權貴恃勢恣橫部使者莫敢誰何訪悉捕治竟
抵之以法所部肅然

善曰赤子弄兵潢池掩捕甚易也而辛公乃移檄
解散其黨權貴恣橫處之頗難而竟以法繩之詩

日剛亦不吐柔亦不茹辛公有焉

彭貴字進唯江西安福縣人正統丙辰進士景泰中
為浙江按察僉事持憲著名蹟無何致仕去語具
事紀

謝潤字德潤直隸祁門縣人天順庚辰進士始官郎
署以剛介質直聞尋陞浙江按察司僉事綢幅無
華不矯矯矜炫而廉直公平風紀振肅永槩之操
久而益勵

郭觀廣東歸善縣人由舉人成化間擢浙江按察司
僉事風度詳整性亦端恪事無巨細必親為裁決
嫉惡如仇奸貪之吏皆重足屏息歷官二十餘年
清操不渝致仕歸家徒壁立解衣質米郡稱廉士
善曰郭公位五品祿入近豐而家徒壁立至解衣
質米廉士之風槩可想矣吾鄉有王先生琪藜藿
不充竟以餓死至今垂令名焉豈非獨立風塵者
哉

張悅字時敏直隸華亭縣人天順庚辰進士成化九
年擢浙江提督學校僉事初以糊名校士尋去之
曰我且自疑人誰信我守屹山岳即貴勢不為動
知人能得士凡經其品鑒者即為名流謝文正遷

少未知名悅置之首選士論甚譁及發解魁天下
衆乃歎服平居無疾言厲色臨事卓有定見諭士
以古聖賢自期待嘗曰古聖賢過人遠甚凡所猷
爲皆至公無私故其事業光明俊偉今之人去古
遠矣每事竭其公忠猶恐不及况可濟以私乎真
名言也仕終南京兵部尚書謚莊簡

善曰惟大賢不以形迹自固彼以道義爲衛名節
爲藩籬安所事形迹哉今糊名易書往往而是無
敢以張公自信者甚則累印襲封委籍於下是欲
以按屬鈴已也嗚呼形迹甚矣無亦世變使然不
得不爾耶

黃榮字儼仁福建莆田縣人少即知砥廉隅氣岸軒
嶄其舅柯官詹潛以大魁負標望視偉之曰甥資
局若是他日將無似舅乎舉成化壬辰進士始官
南京刑部主事從都御史王三原恕理刑江南明
允有執著平反聲譽稍遷本部員外郎陞浙江按
察司僉事典水利時會城運河故道多爲豪右若
旁近奸氓侵鬻以故久就淤塞舟楫艱達榮銳身
以疏濬自任嚴覈簿籍親視畚鍤凡地之舊襲盜
沒者一時釐正不爲關說所怵計自江滸抵北關

數十餘里河渠清肅官私轉餉不費推輓力商旅
德之而積怨叢怒者亦衆矣竟以是賈謗罷歸囊
無分銖日從二三故舊開東井詩社濁醪園蔬陶
然自適卒之日殯事不給第僉事華治之主事柯
維騏續莆陽文獻稱榮與李元廖德徵李純同清
貧後嗣零替咸可憫此其窶即家無衣帛之文子
子有負薪之叔敖豈能過之哉僉謂其言非溢云
善曰黃僉憲治河之績杭文獻又失徵矣茲所載
蓋本興化志云乃其從曾孫別駕議教錢塘時嘗
言僉憲身後無田廬遺子孫至有客游自下
歸者其庶如此

王華字廷光江西南城縣人成化乙未進士始官刑
曹郎昔方按奸黨亂政上下爭爲苛急華獨不顧
利害多所辨明弘治間陞浙江僉事性堅正慎惜
法紀而意嘗近厚鋤強輔弱興學育才政務犁然
有紀未幾感疾卒于官

朱悌字舜敬福建莆田縣人成化戊戌進士弘治戊
午陞浙江按察司僉事整飭溫處兵備悌爲人剛
毅果決廉直無私始官南臺彈劾不避貴勢威望
赫然臺中稱爲鐵漢在浙激濁揚清風采稜厲觸

湖州府志 卷之三十一 三十一
暑行按事不分日夜竟以疲瘁卒清介絕俗死之日衣不給歛妻子貧乏無以自存

善曰朱公在臺中稱爲鐵漢死之日至無以爲歛何其介也傳曰惟無欲者可以擊豪強公亦廉直矣哉

李遜學字希賢河南上蔡縣人成化丁未進士弘治丙辰任浙江按察司提學僉事爲人闊達無城府表裏洞然待士寬厚頗得士心未幾以憂去仕終禮部尚書入內閣專理誥勅爲詩文有藻思以豪

俊稱

蕭翀字凌漢四川內江縣人成化辛丑進士弘治十一年陞浙江按察司僉事才識明敏遇事不爲持難當機立斷在浙五六年間風采振揚清操永潔民情士論皆歸之擢陝西按察司副使去

陳璘字邦瑞山西陽曲縣人弘治癸丑進士正德初陞浙江按察司僉事慎惜法紀恪守官常洞燭下情精於聽讞所部吏畏民懷狐鼠屏迹初璘官臺中九年以伉直不阿忤時宰意徙官浙臬所守不移仕終都御史

杭淮字東卿直隸宜興縣人弘治己未進士正德五

年任浙江按察司僉事氣度溫和持法嚴甚政清而刑不濫雪滯理枉庭中稱平氣節文章皆見推於昔尤工賦咏仕終右副都御史所著有雙溪集王金宇曰良河南臨潁縣人弘治壬戌進士正德已巳擢浙江按察司僉事屬兩浙大饑金入境不待牒報鎮巡輒發廩賑貸時中官鎮守誅求細尤當路者皆重賄免禍金至温州守具白米千石爲餉金詰之守曰昔公以專制發倉忤中貴假此與之爲脫禍資耳金曰爲民而殃民可乎秀才何怯懦至此遂揮去人皆服其壯節已而中貴竟亦無能爲也

善曰人之賂權豪者多藉口免禍夫免禍則有之矣若王公之以正自守不亦壯哉據法信道罔怵人言而以賄自脫王公於是乎不可及矣

楊惟康字叔安河南靈寶縣人弘治已未進士正德五年任浙江按察司僉事分治杭嚴清介嚴肅風裁凜然搜弊剔奸人皆畏服仕終陝西左布政使韓邦奇字汝節陝西朝邑縣人正德戊辰進士歲甲戌擢浙江僉事剛介特立風裁凜然初按浙東貪墨者望風歛避豪強屏息未幾改浙西時中貴王

堂怙寵作威聚歛無厭假上供為名誅求百倍民
 大困邦奇力為裁制堂不得逞乃搆以沮撓 貢
 物有 旨改江西僉事堂心弗懾復重賂錢寧以
 飛語中之竟逮 詔獄瀕死後乃得釋方就逮時
 嘉興守李伸分俸餉之邦奇不受曰以李道甫而
 餽韓汝節雖百金可受但嘉興守不當餽浙僉事
 耳誦謝卻洪尹詩止之伸嘆息而去浙民懷其德
 攀號不忍捨邦奇在治日憫民疲於貢物作富陽
 謹迄今膾炙人口仕終南京兵部尚書
 善曰杭所傳語咸謂韓公以富陽謹得罪彼徒為
 民痛耳而寧也竄易二字遂起大獄奸鋒之中人
 可畏哉

盛端明字希道廣東海陽縣人弘治壬戌進士以省
 元擢第正德十四年陞浙江按察司提學僉事先
 是督學使以調察覈士稍嚴當事者議宜得公正
 和平者代之衆舉端明乃解館職出典學政既至
 則按前所黜士無顯狀者盡與一試為收復者甚
 衆嘗曰育才如種樹廣栽多植方得成林合抱叅
 天胥此焉出豈可盡疑其為荆棘悉加芟刈耶端
 明雖冲和溫粹而性不詭隨人莫敢以私干之踰

年以憂去仕終禮部尚書

熊克懋字士勉四川資陽縣人正德辛未進士嘉靖癸未陞浙江水利僉事往者豪強多侵水利致妨農業及克懋至嚴爲之禁諸所據於豪大家者悉加釐正以業貧民宿弊頓革不畏強禦杭有貴勢挾長欺孤而佔其產克懋一鞠得實力爲直之勢家祈請不已堅拒弗聽輿論快然踰年以憂去

彭占祺字朝吉山東費縣人正德甲戌進士嘉靖四年任浙江按察司僉事直已守道不逐隊旅進爲逢迎憲節所臨風紀丕振竟以孤稜不偶于俗丙

戌考察去歸橐蕭然時仁錢二縣尹知其貧各餽長夫二名以資路費力辭不受二尹嘆服

一善曰彭公以孤稜去位復力辭餽贖彼非可去者也故傳以惜之

林雲同字汝兩福建莆田縣人嘉靖丙戌進士癸巳任浙江提學僉事以明正學廸人材爲已任敦德崇行進諸生以古道每行部與諸生講論道藝多歸於仁義中正疊疊忘倦士皆惕然有省藻鑑精明所甄拔多竒才異等繼崇陽汪文盛之後稱知人能得士者至今皆曰汪林兩公云踰年以憂去

任後數年來叅藩政陞右布政使當是時建安李
默爲左轄兩人皆負時名衆稱良覲未幾轉左轄
公正威嚴精幹勤敏其於民生國計劑量擘畫咸
中程度晉都察院副都御史巡撫湖廣已而致仕
家居二十年隆慶初起官南京工部尚書萬曆丙
子以刑部尚書徵不起年七十八卒贈太子少保
善曰當林先生時余及爲諸生蓋多士嘗愬愬云
語曰師嚴然後道尊道尊然後人知敬學夫嚴者
非苛刻也至如先生近之矣

胡堯臣四川安居縣人嘉靖戊戌進士任浙江按察

司僉事後數年復陞浙江左叅政轉按察使未幾
進右布政使尋轉左操履粹白臨政公平器度雍
容才猷敏贍識治體精法律聽讞明允物情輸服
其在藩轄也定經制節浮淫宿弊旣清民力大舒
列郡咸愛戴之壬戌陞右副都御史巡撫河南
善曰胡公五官浙壤前後在治踰十年浙民戴其
德深矣其爲政則師丹薛宣之流也余因其憲僉
時久於民獨親故署名於僉憲云

都督僉事鎮守浙江

許亨直隸定遠縣人永樂十一年以都督僉事鎮守

浙江正部伍嚴紀律忠誠體國純心愛人善撫士卒恤其困餒在任二十年綏柔和輯軍民咸愛戴之卒之日闔城盡哀悼雖婦人有往哭送葬者浙江都指揮使

徐司馬世爲揚州人元季兵亂司馬生九歲無所依太祖得之以爲子因賜以名旣長出入侍左右屢從征戰有功其在浙銳身任事悉心爲民建置規畫多垂永利歷陞中軍都督僉事卒司馬好文學溫恭謙讓撫綏士卒振恤貧窮尤敬士夫公事之暇退居一室蕭然如韋布之士自少富貴家無餘貲人皆賢之

孫成徐州人少有勇力奮自行伍以征伐功累遷至浙江都指揮使浙東瀕大海島夷乘汛竊發輒爲邊患成獎率徒旅時嚴守備兵革犀利烽堠森嚴海波不興屹負干城之望爲人廉介無私門絕造請人益以是貴之

都指揮同知

王宇字景寬直隸和州人多智好謀趨捷善射正統二年以指揮同知與閩賊決戰屢摧其鋒十四年瑞安羅陽盜起勢甚猖獗我軍遇之輒敗景泰元

年賊衆圍平陽宇乘白馬率敢死士出哨連發三矢斃賊酋長白鷓子等餘黨皆披靡宇因縱兵擊之賊衆崩潰擒斬無筭括州平擢浙江都指揮同知

王瑛河南杞縣人正統七年任浙江都指揮同知十四年征勦平陽叛賊捐生赴敵爲士卒先賊忽奄至我兵少却瑛突陣而死景泰二年贈都指揮使

遣官 諭祭

都指揮僉事

崔源代州人永樂元年由寧波衛指揮同知以剿賊功陞浙江都指揮僉事賊怨其累敗已也合衆攻之源率二弟澄清力戰俱死之

沈麟直隸定遠縣人正統中任浙江都指揮僉事處州賊起麟率衆征勦擣其巢穴多所擒斬賊衆四合勢孤援絕冒陣死景泰二年贈都指揮同知

高舉世襲杭州右衛指揮守官廉慎祿人外無錙銖妄取御史三司同辭推薦卽擢僉浙閩事彌厲初節踰六十致仕疏布終其身壽八十餘卒

陳文字彥章浙江長興人初襲温州衛指揮同知正統間以征閩處功陞浙江都指揮僉事 賜綵幣

天順間提督海道尋選軍政還司成化初總督兩
浙漕運有功 封三代文偉軀儀雅言動善騎射
讀儒書習曉古兵法處官如家臨下不苛事上不
阿待儒碩謹執如弟子篤故舊終其生扶顛持危
不自計利害爲詩平實近唐行書不乏晉風致有
朴菴歸休稿數卷今藏于家

善曰武弁所紀者八人許亨徐司馬孫成善撫士
若王宇能克敵若崔源沈麟王瑛則以死勤事若
高舉則廉靜邁等皆所謂英偉者也孰非矯矯虎
臣也哉近世若陳文亦爲士論所與故併列之

兩浙都轉運鹽使司運使

李慶字積善湖廣景陵縣人以父次陞南雍正統間
任南京戶部浙江司郎中職餉輸先是浙民輸餉
南都例有筆楮裋褐之獻慶悉謝却天順初陞兩
浙都轉運使澡身潔白持法公平時豪商巨賈投
券者踵相躡於庭請給無已慶命一以歲月先後
爲斷權貴請托杜絕不行離政肅然爲他運使甲
未幾以老乞歸歷官二十餘年居僅茅屋數椽田
園不增尺寸歿之日妻子至無以爲歛云

善曰夫薦紳大夫地處膏腴靡爲自潤斯振振舉

其職矣使苟務游聲名而怵權貴之干請抑或礪志蚤歲而不能不隳節于暮齡蓋內外終始符券之難焉乃積善則秉操介特而持法兼亦公平其矚然卓行有徵于沒齒執利權者信莫出其右矣孰謂貢途無拔萃士哉

張吉字克脩江西餘干縣人成化辛丑進士正德四年任兩浙運使志向高明覃心理學操履潔白不以一介自縑雖職司錢穀性度冲曠有翩翩文吏之風恤竈通商國計饒溢仕終左布政使列名

臣籍中

方仕字克學河南固始縣人正德戊辰進士嘉靖八年任兩浙都轉運使襟宇高曠風節毅然爲政不求近名清操卓勵簡于事上而厚於恤民故于俗寡諧遲回四郡復有此轉時世祖明習典章以節槩勵群臣命四品以上毋得折腰以見上官仕仰遵上旨不爲降禮監司者惡其彊直摧抑之仕卽時投劾飄然引去監司猶檢索任內所行毫無汙鱗乃移檄慰留而去已遠矣時論高之善曰高潔之士類多以權離爲汙此獨非職守乎若張公之翩翩文雅方公之投劾引去彼其自待

何如者土苴貨賄又不足言矣錢穀之計能汙賢者哉

同知

胡軫字敬同江西豐城縣人永樂乙未進士宣宗嗣位召對安民策第一後數歲以夔州守左遷兩浙鹽運司同知清介文雅約如素士分司鹺政耻以貨賄自汙公暇輒與諸生講論經史每以月俸供饋具或不給則時園蔬鬻補之正統間陞浙江按察司副使督理學政尋丁內艱去

李棠字師召直隸清苑縣人嘉靖二年任兩浙運使同知庭叅時欲同運使知府聯班並見時上官不可棠遂拂衣而出卽解官歸素秉清操志不詭隨有鴻飛冥冥氣象嗣後繼之者雖不得與使守聯班亦不混于衆職迄今爲然寔是棠啓之也

錢瀾字希孟直隸阜城縣人嘉靖六年任運司同知性高潔耻以財利自汙司鹺政者八年永槩之操始終無玷爲政不務矯飾無赫赫名而商民實陰德之兩浙廉吏稱最著者咸謂項城婁志德與瀾爲無愧云

善曰瀾爲轉運丞貳任職最久乃能以清白始終

其官與項城婁公絜芳齊聲身之所享者不貲矣
孰謂廉吏果無所得乎

副使

李和山東益都縣人弘治十四年由郡掾任兩浙運
司知事雅志脩潔以清白自勵常俸之外嚼然不
緇嘗攝分司督課果決精明奸胥畏服豪竈憚其
風采不敢以家衆應役正德初陞本司判官進副
使釐奸革弊鹺政一清

萬曆杭州府志卷之六十一終

